

四庫全書

史部

欽定四庫全書

資治通鑑後編卷七十四

刑部尚書徐乾學撰

宋紀七十四

起柔兆敦牂正月  
盡十二月凡一年

英宗體乾應厯隆功盛德憲文肅武睿聖宣孝皇  
帝

治平三年春正月壬申以翰林學士知制誥范鎮為翰林侍讀學士知陳州初鎮草韓琦遷官制稱引周公霍

光諫官呂誨駁之於是琦表求去位鎮批答曰周公之

不之魯欲天下之一乎周上以鎮不當引聖人比宰相欲

罷鎮內職執政因諭鎮令自請外而有是命

李燾曰或云鎮與歐

陽修雅相善及議濮王追崇事首忤修意修乘間為上言鎮以周公待琦則是以孺子待陛下也鎮坐此出

上於制誥多親閱有不中理必使改之嘗謂執政曰此

人君謨訓豈可褒貶失實也先是知制誥韓維奏事便

殿嘗言人君好惡當明見賞刑以示天下使人知所避

就則風俗可移又言思慮不能全無過差假如陛下誤

欽定四庫全書

資治通鑑後編卷七十四

刑部尚書徐乾學撰

宋紀七十四

起柔兆敦牂正月  
盡十二月凡一年

英宗體乾應厯隆功盛德憲文肅武睿聖宣孝皇  
帝

治平三年春正月壬申以翰林學士知制誥范鎮為翰林侍讀學士知陳州初鎮草韓琦遷官制稱引周公霍



光諫官呂誨駁之於是琦表求去位鎮批答曰周公之

不之魯欲天下之一乎周上以鎮不當引聖人比宰相欲

罷鎮內職執政因諭鎮令自請外而有是命

李燾曰或云鎮與歐

陽修雅相善及議濮王追崇事首忤修意修乘間為上言鎮以周公待琦則是以獮子待陛下也鎮坐此出

上於制誥多親閱有不中理必使改之嘗謂執政曰此

人君謨訓豈可褒貶失實也先是知制誥韓維奏事便

殿嘗言人君好惡當明見賞刑以示天下使人知所避

就則風俗可移又言思慮不能全無過差假如陛下誤

有處分改之則足以彰納善從諫之美及鎮補外維言  
鎮誠有罪自可明正典刑若其所失止在文字當函容  
以全近臣體貌陛下前黜錢公輔中外以為太重今又  
黜鎮而衆莫知其所謂臣恐自此各懷疑懼莫敢為陛  
下盡忠者矣 癸酉契丹改國號曰大遼 乙亥宣徽  
南院使武安節度使程戡卒戡守延州凡六年安重習  
事治不近名然不為言者所與初延州夾河為兩城雉  
堞卑薄嘗為夏賊攻圍登九州臺下瞰城中戡調兵夫

大增築之後以為利橫山酋豪怨諒祚欲以屬叛取靈  
夏來求兵為援戡言豺虎非其相搏則未易取也癰疽  
非其自潰則未易攻也諒祚久悖慢當乘此聽許以蠻  
夷攻蠻夷中國之利也會帝不豫大臣重生事遂寢不  
報自以年過七十告老章凡十數上終弗聽遣中使齎  
手詔問勞賜茶藥黃金乃再上章曰臣老疾劇矣高奴  
屯勁兵為要地豈養病所耶還至鄧城卒贈太尉諡康  
穆 辛巳以端明殿學士知徐州張方平為翰林學士

承旨初上謂執政學士獨王珪能為詔餘多不稱職因問方平文學如何歐陽修對曰方平亦有文學但挾邪不直曾公亮以為不聞其挾邪趙槩又以為無迹故卒命之上嘗問治道體要方平以簡易誠明為對上不覺前席曰朕昔奉朝請望侍從大臣以謂皆天下選人今多不然聞學士之言始知有人矣御史呂大防言竊聞參知政事趙槩舉張方平錢明逸乞加顯用傳播之初實驚物聽方平明逸皆以制策登科早列侍從不聞有

嘉猷善狀著於時論而出領事任所至不治豈足以謀  
謨廟堂之上經綸天下之務哉竊以槩備位輔臣與國  
一體不能昌言公論進賢退不肖而牽於私舊引非其  
人失大臣憂國致君之道伏望出臣此章下槩問狀以  
懲不恪 命翰林學士馮京修撰仁宗實錄 壬午罷  
三司推勘官初詔三司舉京朝官一人專領推勘事至  
是三司奏以為不便罷之然議者不以罷之為便也

嘉祐

五年  
置

工部員外郎兼侍御史知雜事呂誨與侍御史

范純仁監察御史裏行呂大防合奏曰伏見參知政事  
歐陽修首開邪議以枉道悅人主以近利負先帝將陷  
陛下於過舉龍圖閣直學士司馬光亦上疏請罷追崇  
之議皆不報誨等論列不已而中書亦以劄子自辯於  
上上意不能不嚮中書然未即下詔也執政乃相與密  
議欲令皇太后下手書尊濮安懿王為皇夫人為后皇  
帝稱親又令上下詔謙讓不受尊號但稱親即園立廟  
以示非上意且欲為異日推崇之漸丙子中書奏事垂

拱殿時韓琦以祠祭致齋上特遣中使召與共議既退  
外間言濮王已議定稱皇歐陽修手為詔草二通一納  
上前日中太后果遣中使齋實封文書至中書執政相  
視而笑誨等聞之即納繳御史告勅居家待罪乞早賜  
黜責上以御寶封告勅遣內侍陳守清趣誨等令赴臺  
供職誨等以所言不用雖受告勅猶居家待罪 丁丑  
中書奏事上又遣中使召韓琦同議即降勅稱准皇太  
后手書濮安懿王譙國太夫人王氏襄國太夫人韓氏

仙遊縣君任氏可令皇帝稱親仍尊濮安懿王為濮安  
懿皇譙國襄國仙遊並稱后又降勅稱上手詔朕面奉  
皇太后慈旨已降手書如前朕以方承大統懼德不勝  
稱親之禮謹遵慈訓追崇之典豈易克當且欲以瑩為  
園即園立廟俾王子孫主奉祠事皇太后諒茲誠懇即  
賜允從又詔濮安懿王子瀛州防禦使岐國公宗樸候  
服闋除節度觀察留後改封濮國公主奉濮王祀事  
呂誨等閉門待罪屢上疏乞早賜黜謫庚辰呂誨等又



奏臣等本以歐陽修首啟邪議誑誤聖心韓琦等依違附會不早辨正累具彈奏乞行朝典近覩皇太后手書追崇之典並用哀桓衰世故事乃與政府元議相符中外之論皆以為韓琦密與中官蘇利涉高居簡往來交結上惑母后有此指揮蓋欲歸過至尊自掩其惡賣弄之迹欲蓋而彰欺君負國乃致如此首議之臣安得不誅臣等待罪於家屢蒙詔旨促令供職而踧踖未敢承命以此故也若必使臣等就職則當合班庭爭以救朝

廷之失雖陛下容納直言為天下所聞而臣等不能早  
悟明主之罪益深重矣豈可復居言路為耳目之官哉  
區區之心有死無二惟陛下留神聽納上令中書降劄  
子趣使赴臺供職而誨等繳還劄子并後所奏九狀申  
中書堅辭臺職是日詔避濮安懿王名下一字置濮安  
懿王園令一人以使大臣為之募兵二百人以奉園為  
額又令河南置栢子戶五十人命帶御器械王世寧權  
發遣戶部判官張徽度濮安懿王園廟地圖上皆從中

書所請也 壬午詔罷尚書省集議濮安懿王典禮中  
書進呈呂誨等所申奏狀上問執政當如何韓琦對曰  
臣等忠邪陛下所知歐陽修曰御史以為理難並立若  
以臣等為有罪即當留御史若以臣等為無罪則取聖  
旨上猶豫久之乃令出御史既而曰不宜責之太重也  
於是誨罷侍御史知雜事以工部員外郎知蘄州范純  
仁以侍御史通判安州呂大防落監察御史裏行以太  
常博士知休寧縣故事知雜御史解官皆有誥詞時知

制誥韓維當直又兼領通進銀臺司門下封駁事執政  
恐維繳詞不肯草制及封駁勅命遂徑以勅送呂誨等  
家仍以累不遵稟聖旨赴臺供職為誨等罪維言罷黜  
御史事關政體而不使有司預聞紀綱之失無甚於此  
宜追還誨等勅命由銀臺司使臣得申議論以正官法  
又言誨等能審論守職國之忠臣計其用心不過欲陞  
下盡如先王之法而止耳士大夫貪固寵利厚賞嚴罰  
猶恐此風不變而復內牽邪說貶斥正人自此陛下耳

日益壅蔽矣又求對極論其失請追還前勅令百官詳議以盡人情復召誨等還任舊職以全政體皆不從是日詔翰林學士知制誥御史中丞知雜各舉御史兩人以起居舍人同知諫院傅堯俞兼侍御史知雜事司馬光言竊聞呂誨范純仁呂大防因言濮王典禮事盡被責降中外聞之無不駭愕臣觀此三人忠亮剛正憂公忘家求諸羣臣罕見其比今一旦以言事太切盡從竄斥臣竊為朝廷惜之臣聞人君所以安榮者莫大於

得人心今陛下徇政府一二人之情違舉朝公議尊崇  
濮王過於禮制天下之人已知陛下為仁宗後志意不  
專悵然失望今又取言事之臣羣輩逐之臣恐累於聖  
德所損不細閭里之間腹非竊嘆者多矣伏望聖慈亟  
令誨等還臺供職不則且為之別改近地一官亦可以  
少慰外人之心也呂公著言呂誨等以論事過當並從  
責降聞命之始物論騰沸皆云陛下自即位以來納善  
從諫之風未形於天下今誨等又全臺被黜竊恐義士

鉗口忠臣解體且自古人君納諫則興拒諫則亡興亡之機不可不審臣願陛下以天地之量包荒含垢特追誨等勅命令依舊供職則天下幸甚二月乙酉朔白虹貫日命殿中丞蘇軾直史館上在藩邸聞軾名欲以唐故事召入翰林知制誥韓琦曰蘇軾遠大之器也他日自當為天下用要在朝廷培養之使天下之士莫不畏慕然後取而用之則人人無復異辭矣今驟用之恐天下之士未必皆以為然適足累之也上曰知制誥

既未可與修起居注可乎琦日記注與制誥為鄰未可  
遽授不若於館閣中擇近上貼職與之且請召試上曰  
未知其能否故試如蘇軾有不能耶琦言不可乃試而  
命之他日歐陽修具以告軾軾曰韓公可謂愛人以德  
矣乙巳潁王府翊善邵亢奏皇子潁王天質早茂嫻  
媾及期方陛下即位之初而元嗣克家之日推之於禮  
莫重於斯臣伏見國朝親王聘納雖開寶通禮具有舊  
儀而因循未嘗施行欲乞下太常禮院博採舊典修撰



賴王聘納儀範其故事非禮者悉罷之詔禮院詳定禮  
院奏請如會要故事從之三月丁巳賜羣臣御筵於  
諸園苑庚申彗星辰見於壁長七尺許辛酉起居  
舍人同知諫院傅堯俞侍御史趙鼎趙瞻自契丹使歸  
以常與呂誨言濮王事家居待罪而堯俞辭新除侍御  
史知雜事告牒不受稽首上前曰臣初建言在誨前今  
誨等逐而臣獨進不敢就職上數諭留堯俞等堯俞等  
終求去乃以堯俞知和州鼎通判淄州瞻通判汾州司

馬光言比蒙聖恩宣諭濮王稱親事云此事朕不欲稱  
假使只稱濮王與仙遊縣君有何不可臣乃知陛下至  
公初無過厚於私親之意直為政府所誤以致外議紛  
紛必謂旦夕下詔罷去親名其已出臺官當別有除改  
見任臺官亦優加撫諭使之就職今忽聞傳堯俞等三  
人相繼皆出中外之人無不驚愕此政府欲閉塞來者  
使皆不敢言然後得專秉大權逞其胸臆耳伏望陛下  
特發宸斷召還堯俞等下詔更不稱親如此則可以立

使天下憤懣之氣化為歡欣誹謗之語更為謳歌矣不從光遂奏請與堯俞等同責因家居待罪又奏陛下即位之年臣已會上疏預戒追尊之事及過仁宗大祥臣即與堯俞詣政府白以為人後者不得顧私親之義當兩制禮官共議時臣又獨為衆人手撰奏草若治其罪臣當為首其呂誨等係後來論列既蒙譴逐如臣者豈宜容恕縱陛下至仁特加保庇臣能不愧於心乎有詔促光赴經筵供職光又奏乞早賜降黜凡四奏卒不從

壬戌以屯田員外郎簽書江寧節度判官事孫昌齡  
為殿中侍御史太常博士監永豐倉郭源明為監察御  
史裏行源明勸子也 甲子以都官員外郎黃炤為侍  
御史太常博士蔣之奇為監察御史裏行初命王珪等  
舉官已除孫昌齡及郭源明而尚闕兩員中書以珪等  
前所舉都官員外郎孔宗翰等七名進而炤中選上又  
特批之奇與御史歐陽修素厚之奇前舉制科不入等  
嘗詣修盛言追崇濮王為是深非范百祿所對修因力

薦之即與炤並命之奇入對上面諭曰朕嚮覽卿所對策甚善而有司誤遺故親有是除之奇宜與人堂從子宗翰道輔子也先是禁中遣使泛至諸臣家為皇子穎王擇配記室韓維奏王孝友聰明動履法度方嚮經學以觀成德今卜姓授室其係尤重宜歷選勲望之家精揀淑媛考古納采問名之義以禮成之不宜苟取華色而已也至是納故宰相向敏中孫女為穎王婦封安國夫人戊辰上親錄囚庚午以彗出避正殿減常膳上

對樞臣以彗為憂胡宿請備邊呂公弼曰彗非小變不可不懼陛下宜側身修德以祇天戒臣恐患不在邊也新除監察御史裏行郭源明奏免除命乞追還呂誨等詔聽源明免以告牒納中書 辛未手詔曰朕近奉皇太后慈旨濮王令朕稱親仍有追崇之命朕惟漢史宣帝本生父稱曰親又謚曰悼裁置奉邑皆應經義既有典故遂遵慈訓而不敢當追崇之典朕又以上承仁孝廟社之重義不得兼奉私親故但即園立廟俾王子孫

世襲濮國自主祭祀遠嫌有別蓋欲為萬世法豈皆權  
宜之舉哉而臺官呂誨等始者耑執合稱皇伯追封大  
國之義朕以本生之親改稱皇伯歷考前世並無典據  
追封大國則又禮無加爵之道向自罷議之後誨等奏  
促不已忽其未行乃引漢哀帝去恭皇定陶之號立廟  
京師干亂正統之事皆朝廷未嘗議及者歷加誣詆自  
此師丹意欲搖動人情眩惑衆聽以致封還誥勅擅不  
赴臺明繳留中之奏於中書錄傳訛上之文於都下暨

手詔之出誨等則以稱親立廟皆為不當朕覽誨等前  
疏亦云生育之恩禮宜追厚俟祥禫既畢然後講求典  
禮褒崇本親今乃反以稱親為非前後之言自相牴牾  
傅堯俞等不顧義禮更相唱和既撓權而示衆復歸過  
以取名朕姑務含容屈於明憲止命各以本官補外尚  
慮搢紳之間士民之衆不詳本末但惑傳聞欲釋羣疑  
理當申諭宜令中書門下俾御史臺出榜朝堂及進奏  
院遍牒告示庶知朕意 命左諫議大夫天章閣待制



兼侍講李受赴諫院供職 癸酉詔曰去秋以來雨潦  
為沴撫存賑濟甫臻和平今星躔生變咎證昭灼撫躬  
以思怒焉如疾天威震動勅戒在眇躬洗心自新宜自  
朕始故避殿撤膳夙夜惕厲永惟四海之內獄訟煩冤  
調役頻冗與夫鰥寡孤獨死亡貧苦甚可傷也轉運使  
提點刑獄分行省察而矜恤之利病大者悉以聞庶仁  
恩家至副朕寅畏之心焉 辛巳慧晨見於昴如太白  
長丈有五尺壬午孛於畢如月 夏四月甲申朔觀文

殿學士戶部侍郎孫沔自環慶改帥廊延未至卒於道  
贈兵部尚書諡曰威敏沔居官以才力聞強直少所憚  
然喜燕遊女色故中間坐廢 丙戌禮院言濮安懿王  
建廟當行祭告而宗樸喪服未除請權以本宮諸弟攝  
事其祝文令教授為之初命翰林學士馮京撰祝文京  
言本院未有體式乞下禮院議禮院議稱皇帝某謹遣  
官恭告於親濮安懿王既而以前詔俾王子孫奉祠事  
乃更定此議帝嘗以稱親之議質於天章閣待制兼侍

講王獵獵以為不可帝曰王相待素厚亦持此說耶獵對曰臣被王恩厚故不敢以非禮名號加於王所以為報也命密州觀察使宗旦同知大宗正司事宗旦居所生母喪以孝聞始請別擇地以葬歲時奠祀後著為法己丑賜工部侍郎致仕皇甫泌帛一百疋泌獻所著周易精義等書上曰泌老不廢學貧而守節可尚也故有是賜賜真定府僧懷丙紫衣初河中府浮梁用鐵牛八維之一牛且數萬斤後水暴漲絕梁牛沒於河

募能出之者懷丙以二大舟實土夾牛維之用大木為  
權衡狀鈎牛徐去其土舟浮牛出轉運使張燾以聞而  
有是賜以工部郎中天章閣待制陸說為兵部郎中  
鄭延路都總管經畧安撫使兼知延州贈皇后弟內

殿崇班高士林德州刺史士林將家子獨喜學上嘗以  
謹守法律四字誨之曰能如此則為良吏矣每欲進擢

后屢辭既卒始追贈焉

明年又贈  
節度使

乙未穎王府翊善

同修起居注邵亢以知制誥知諫院兼判司農寺於是

上謂潁王曰翊善端直朴厚已輟為諫官矣王頴首謝以金部員外郎天章閣侍講傅卞為起居舍人同知諫院卞議濮王典禮與執政意合故驟進以度支郎中王稷臣直集賢院充潁王府翊善令於皇子兩位供職辛丑命龍圖閣直學士兼侍講司馬光編歷代君臣事迹於是光奏曰臣自少以來畧涉羣史竊見紀傳之體文字繁多雖以衡門專學之士往往讀之不能周浹况於帝王日有萬幾必欲徧知前世得失誠為未易竊

不自揆常欲上自戰國下至五代正史之外旁採他書  
凡闕國家之盛衰係生民之休戚善可為法惡可為戒  
帝王所宜知者畧依左氏春秋傳體為編年一書名曰  
通志其餘浮冗之文悉刪去不載庶幾聽覽不勞而聞  
見甚博私家區區力不能辦徒有其志而無所成頃臣  
曾以戰國時八卷上進幸蒙賜覽今所奉詔旨未審令  
臣續成此書或別有編集若續此書乞亦以通志為名  
其書上下貫串千餘載固非愚臣所能獨修伏見翁源

縣令廣南西路經畧安撫司勾當公事劉恕將作監主簿趙君錫皆以史學為衆所推欲望特差二人與臣同修庶幾使得早成書不至疏畧從之而令接所進八卷編集俟書成取旨賜名其後君錫以父喪不赴命太常博士國子監直講劉放代之恕均州人君錫良規之子放敬弟也司空致仕鄭國公宋庠卒帝方以災異避正殿有司誤奏母臨喪乃為挽辭二篇賜之贈太尉兼侍中謚元憲帝為篆其墓碑曰忠規德範之碑庠自應

舉時即與弟初以文學名擅天下儉約不好聲色讀書  
至老不倦尤畏法在揚州使工甓堂塗取卮酒與之後  
知誤取公使立償之而取予者皆被罰其為相雅練故  
事自初執政遇事輒分別是非可否用是斥退及再登  
用遂浮沉自安然天資忠厚嘗曰逆詐恃明殘人矜才  
吾終身弗為也沈邈嘗為京東轉運使數以事侵庠及  
庠在洛陽邈子為府屬所惡欲痛治之以法庠獨不肯  
曰是安足罪也人以此益稱其長者 戊申以河東轉



運使吳充為鹽鐵副使上雅知充前此數問充所在會  
充入覲上諭以教授時事嘉勞之居河東纔半歲即召  
入樞密副使禮部侍郎胡宿屢乞致仕庚戌罷為吏  
部侍郎觀文殿學士知杭州以殿前都虞候容州觀  
察使郭逵檢校太保同簽書樞密院事同簽書樞密院  
事自逵始於是知制誥卽必當制草詞以進言逵武力  
之士不可置廟堂望留誥勅與執政熟議弗聽逵既入  
西府衆多不服或以咎韓琦琦曰吾非不知逵望輕也

故事西府當用一武臣上欲命李端愿吾知端愿傾邪

故以達當之

李燾曰或云上本意欲用張方平韓琦知方平不附已猥曰西府久不用武臣宜稍

復故事上督其人知諫院邵亢御史吳申呂景交章論無以應乃遽用達

祖宗朝樞府參用武臣如曹彬父子馬知節王德用狄

青勲勞為天下所稱則可達黠佞小才豈堪大用不報

司天監奏彗星浸微羣臣詣閣門拜表乞御正殿復

常膳不許自是三表乃許之五月乙丑詔河北戰兵

三十萬陝西戰兵四十五萬并義勇令本路都總管常

加訓練毋得占役時邊臣或奏請增兵朝廷以為兵數不少故降是詔是日彗行至張而沒彗之未沒也言者多以為憂或告韓琦琦曰借使復有一星出欲何為

乎

此據  
日記

戊辰上謂宰臣曰朕日與公等相見每欲從

容講論治道但患進呈文字頗繁多不暇今中書常務有可付有司者悉以付之自是中書細務止進熟狀及事有定制者歸有司中書降勅而已庚午詔中書樞密自今朔望會於南廳吏部流內銓進編修銓曹格

勅十四卷詔行之 右武衛大將軍果州刺史叔褒領  
文州團練使初制宗室入學十五以上通兩經者大宗  
正以聞命官試論及大義中者度高下賜出身或遷官  
至是叔褒試所學中格故有是命叔褒德恭曾孫也

丁丑以屯田員外郎王克臣子孝莊為右屯衛將軍駙  
馬都尉賜名師約以尚德寧公主故也初上數稱唐公  
主多下嫁名人及選得師約其父子皆業進士令至宰  
相第試以詩并其所業賦一編進御召見清居殿又諭

以毋廢學後又出經籍及紙筆硯墨賜之 六月乙酉  
以駕部郎中知磁州李田監淄州鹽酒稅務嘉祐六年  
始置考課法至是考課院言田再考在劣等故有是命  
坐考劣降等自田始 己亥免陸詵正衙令入見上勞  
問之曰卿嶺外處畫無不當者廊延最當要道故選用  
卿今將何先詵曰邊事難以遙度抑未審陛下意在安  
靜或欲示威也上曰大抵邊陲宜以安靜為務昨王素  
為朕言朝廷與帥臣常欲無事自餘將校無不生事要

功者卿謂此言如何說曰素言是也陛下能責任將帥令  
疆場無事即天下幸甚上稱善 辛卯以太常博士劉  
庠為監察御史裏行庠私議濮王事與執政意合故命  
以言職 贈故霸州文安縣主簿太常禮院編纂禮書  
蘇洵光祿寺丞所修書方奏未報而洵卒賜其家銀絹  
各百兩足其子殿中丞直史館軾辭所賜求贈官既從  
之又特勅有司具舟載其喪歸蜀嘉祐初王安石名始  
盛黨友傾一時歐陽修亦善之勸洵與安石游而安石

亦願交於洵洵曰吾知其人矣安石母死士大夫皆弔  
洵獨不往作辨姦一篇洵既沒三年而安石用事其言  
乃信張方平嘗論洵曰定天下之臧否一人而已 己  
酉御崇政殿疎決在京繫囚 壬子改清政殿曰欽明  
召直集賢院王廣淵書洪範於屏謂廣淵曰先帝臨御  
四十年天下承平得以無為朕方屬多事豈敢言自逸  
故改此殿名因訪廣淵先儒論洪範得失廣淵對以張  
景所得最深遂進景論七篇明日復召對延和殿謂廣

淵曰景所說過先儒遠矣以三德為馭臣之柄尤為善  
論朕遇臣下常務謙柔聽納之間則自以剛斷此屏置  
之坐右非特開元無逸圖也 秋七月甲寅以屯田員  
外郎吳申為殿中侍御史初劉庠舉申自代上曰朕固  
知申遂擢用焉庠申門人也自傳卞議濮王事稱旨庠  
及申私論與卞協故相繼並居言職 乙丑以奉國留  
後號國公宗諤為保靜節度使於是濮王子孫及魯王  
孫各遷官一等遷者凡二十人上之為皇子辭疾不肯



入宮詔本位長屬敦促宗諤最長於時勸行及上即位  
宗諤上十餘章論功上不得已特遷奉國留後中書召  
知制誥韓維命辭再三屬之曰語勿太深也宗諤在藩  
素嫉上宗諤有庖夫善羊膾上使人為膾兩盤宗諤見  
問之對曰十三使之膾也宗諤怒毀器覆肉笞其庖夫  
宗諤性陰狡所惡婢妾往往鴆殺之 八月己亥以龍  
圖閣直學士兼侍講呂公著知蔡州公著嘗言濮安懿  
王不當稱親及頒諱於天下又請追還呂誨等皆不從

即稱疾求補外官上曰學士朕所重豈得輕去朝廷公  
著家居者百餘日上遣內侍楊安道即家敦諭且戒安  
道曰公著勁直宜徐徐開曉語勿太迫也又數令公著  
兄公弼勸之公著起就職才數月復上章請出故有是  
命九月壬子朔日有食之癸丑以知制誥史館修  
撰蔡抗為龍圖閣直學士知定州上謂抗曰第行且召  
卿矣郡兵番戍室家留營多不謹夫歸輒首原抗下令  
悉按以法戍兵感之乙卯命知制誥宋敏求題濮安

懿王及三夫人廟主於園 丙辰幸天章寶文閣命兩  
府觀翰林學士王珪所書仁宗御書詩石刻初仁宗立  
上為皇子珪請對而後草詔後有間珪者是日上御藥  
珠殿召珪設紫花墩賜坐勞問久之詔中書授珪兼端  
明殿學士且諭曰執政員闕即命卿矣翌日又賜盤龍  
金盆一珪惶恐以謝上謂曰朕知卿忠純有守曩者有  
讒語朕今釋然無疑故有此賜珪頓首曰非陛下保全  
臣何以至此 癸亥詔待制已上自遷官後六歲無過

則復遷之有過亦展年至諫議大夫止京朝官四歲磨  
勘至前行郎中止少卿監仍以七十員為定員有闕即  
檢勘前行郎中遷及四歲以上校月日之久者次補之  
少卿監以上遷官聽旨如別有勞績或因要重任使特  
旨推恩者即不在此例 乙丑以太常博士監察御史  
裏行馬默守本官通判懷州初默彈奏濟州防禦使李  
珣犯銷金并匠人送開封府官吏不能正其罪又言宗  
惠女使當如法錄問且請自今外人罪連宗室大辟皆

錄問然後斷又言國子監直講劉攽輕薄無行多結交  
富貴舉人不可為開封試官又言趙及所壞倉米十八  
萬石當治米所以濕惡并劾提點倉場李希逸以不覺  
察而及等實由希逸舉發默除御史時攽有戲言默用  
此怒故妄彈奏攽默又屢言濮王不宜稱親上以為疎  
繆故絀之御史劉庠奏乞留默弗聽 皇城司嘗捕銷  
金衣送開封府推官竇卞上殿請其獄會有以內庭為  
言者上疑之卞曰真宗禁銷金自掖庭始今不正以法

無以示天下且非祖宗立法意上曰然文王刑於寡妻  
至於兄弟以御於家邦正謂此耳詔如卞請 庚辰知  
諫院傅卞言風聞貴戚奏薦恩澤未經減定或托以親  
戚濫及高貲商販之徒詔自今妃嬪公主以下非有服  
親若有服親之夫無得奏薦 是月夏國主諒祚舉兵  
寇大順城入寇柔遠寨燒屈乞等三村柵段木嶺初環  
慶經畧安撫使蔡挺知諒祚將入寇即遣諸將分屯要  
害以大順城堅雖被攻不可破不益兵柔遠城惡命副

都總管張玉將重兵守之敕近邊熟戶入保清野戒諸寨無得逆戰諒祚將步騎數萬攻圍大順三日蕃官趙明與官兵合擊之諒祚銀甲氍帽以督戰挺先選強弩八列於壕外注矢下射重甲洞貫諒祚中流矢遁去復寇柔遠張玉募膽勇三千人夜出擾賊營賊遂驚潰上遣中使賜挺手詔慰勞諒祚退屯金湯聲言益發步騎且出嫚辭須已得歲賜復攻圍大順城廊延經畧安撫使陸詵言朝廷積習姑息故賊敢狂悖不稍加詰責則

國威不立即止其歲賜銀帛牒宥州問故上喜曰固知此人可倚也詔詵得宥州報具聞而諒祚果大沮盤桓寨下取糧而反卒不敢入寇又歲儉貧願得賜物乃報言邊吏擅興兵行且誅之矣冬十月壬午朔以仙遊縣君任氏墳域為園從禮院所奏也癸未遣西京左藏庫副使何次公齎詔賜夏國主諒祚問所以入寇之故仍止其歲賜銀帛陸詵言彼頗順矣不若且賜時服因以詔問之彼必感懼今特遣次公彼多姦詐或疑朝



廷畏已則未遽服也不從 甲申以戶部判官直集賢院王廣淵直龍圖閣兼侍讀集賢殿修撰周孟陽兼侍講帝不豫廣淵憂思忘食寢帝自為詔以慰安之曰朕疾少間矣丁酉詔兩日一御邇英講讀時上已不豫然近臣尚未知也於是皇子潁王等引仁宗故事以請從之 丁亥詔曰先帝以士久不貢則急於學而豪杰者不時舉故下間歲之令冀以得人而自更法以來其弊浸長何者里選之牒仍故而郡國之取減半計偕之籍

屢上而道途之勞良苦朕甚閱焉其令禮部三歲一貢  
舉天下解額於未行間歲之法已前率四分取三分禮  
部奏名進士以三百人為額明經諸科不得過進士之  
數

本志云自是恩典不增而貢舉乃  
緩士得休息官以不煩矣今削去

以同簽書樞密

院郭遠為陝西四路沿邊宣撫使兼權判渭州遠懇辭  
簽書上曰初欲授卿宣徽使慮外人以為罷政第領樞  
職往以重使權 甲午詔宰臣參知政事舉才行士可  
試館職者各五人先是上謂中書曰水潦為災言事者多

云不進賢何也歐陽修曰近年進賢之路太狹誠當今所患臣每與韓琦等論議未合上曰何謂進賢路狹中書常所進擬者其人皆如何修曰自富弼韓琦當國以來十數年間外自監司內則省府此類選擢甚精時亦得人然皆是錢穀刑名強幹之吏此所謂用才臣言進賢路狹乃館職也上曰如何修曰朝廷用人之法自兩制選居兩府自三館選居兩制然則三館者輔相養材之地也往時入三館有三路今塞其二矣此臣所謂太

狹也上曰何謂三路修曰進士高科一路也大臣薦舉一路也因差遣例除一路也往時進士五人以上及第者皆得試館職第一人及第不下十年有至輔相者今第一人及第兩任凡十年方得試館職而第二人以下無復得試是高科一路塞矣往時大臣薦舉隨即召試今止令上簿候館閣闕人乃試而館閣人初無員數無有闕時則上簿者永無試期是薦舉一路又塞矣唯有因差遣例除者半是年勞老病之人此臣之所謂進賢

路太狹也。新格置編校官八人，皆用選人。歷七年，乃自校勘除校理。此外未嘗有所擢用。臣謂此八員者，宜仍舊他員或闕，即令中書擇人進擬。庶無遺賢。上嘉納之。故有是詔。因謂輔臣曰：「館閣養才之地，比欲選數人出，使無可者，公等其各為朕搜揚。雖執政親戚世家，勿避朕當親閱，可否於是。」韓琦曾公亮、歐陽修、趙槩等所舉蔡延慶、夏倚，已見嘉祐二年王汾、葉均、劉攽、章惇、胡宗愈、王存、李常、張公裕、王介、蘇軾、安燾、蒲宗孟、陳侗、陳睦、李清臣。

朱初平黃履劉摯凡二十人上皆令召試琦等以人多  
難之上曰既委公等舉之苟賢豈患多也乃令先召擢  
提點陝西刑獄度支員外郎蔡延慶等十人餘須後試  
延慶齊子也 丙午羣臣以來歲元會表上尊號曰體  
乾應歷文武聖孝皇帝詔不許五表乃許之 十一月  
甲寅以慶州蕃官都巡檢使趙明領順州刺史以摯夏  
人於大順城有功也於是將士及蕃官有功者隨輕重  
賞之 戊午帝不豫 己巳歸徐國公主於王氏皇后

及皇子潁王東陽郡王送至第詔皇后翼日乃歸司  
馬光奏臣伏見陛下踐阼以來太陽侵色中有黑子大  
風晝晦冬溫無冰連年大水漂沒廬田以至今歲災異  
尤甚彗星彰見光炎隆熾朝東暮西連月乃滅飛蝗害  
稼日有食之加之陝西河東夏秋乏雨未既不收麥仍  
未種婦子悽惶流離充道西戎內侮邊鄙未安當此之  
際羣臣宜勸導陛下以祇畏天命勤恤民隱克己謙約  
博求至言以消復變咎延致善祥而朝廷晏然曾不為

意或以為自有常數非關人事或以為景星嘉瑞更當  
有福今者又有佞臣建議請上尊號其為欺蔽上天誣  
罔海內孰甚於此使上帝鬼神怫鬱不懌自拜表以來  
陛下嬰此疾疹久而未愈此皆羣臣諂諛之罪陛下豈  
得不省悟而深思哉臣不勝區區忘生觸死伏望陛下  
自以聖意止羣臣所上章表却尊號而弗受更下詔書  
深自咎責咨謀四方廣開言路求所以事天養民轉災  
為福之道俟聖體康復政化流通天時豐穰人心悅豫



然後推崇徽號何晚之有臣荷國大恩承乏侍從誠見  
近日羣臣皆以言為諱入則拜手稽首請加鴻名出則  
錯立族談腹非竊笑終無一人為陛下正言其不可者  
臣竊痛之是敢妄進狂瞽唯聖明采察不從 初夏人  
寇大順上問兩府策將安出宰相韓琦請留止歲賜遣  
使齎詔往問樞密使文彥博等曰如此則邊釁大矣因  
引寶元康定之喪師以動上意琦曰兵家須料彼此今  
日禦戎之備大過昔時且諒祚狂童豈可比元昊也詰

之必服上竟從琦議遣何次公往使逾月次公還以諒  
祚表進上已卧疾輔臣因入問起居畢琦扣御榻曰諒  
祚服罪否上力疾顧琦曰一如所料諒祚所上表雖云  
受賜累朝敢渝先誓然尚多游辭歸罪於其邊吏乃復  
賜詔詰之令嵩遣使別貢誓表具言今後嚴戒邊上酋  
長各守封疆不得點集人馬輒相侵犯其廊延環慶涇  
原秦鳳等路一帶久係漢界熟戶并順漢西蕃不得更  
行劫虜及逼脅歸役所有漢界不逞叛亡之人亦不得

更有招納苟渝此約是為絕好餘則遵依先降誓詔朝廷恩禮自當一切如舊先是帝久服藥監察御史裏行劉庠奏請立皇子帝不懌封其奏一日宰相韓琦等問起居退穎王出寢門憂形於色顧琦曰奈何琦曰願大王朝夕勿離上左右王曰此乃人子之職琦曰非為此也王感悟去帝自得疾不能語凡處分事皆筆於紙十二月辛丑帝疾增劇輔臣問起居罷琦復奏曰陛下久不視朝中外憂惶宜早立皇太子以安衆心帝頷

之琦請帝親筆指揮帝乃書曰立大王為皇太子琦曰  
必賴王也煩聖躬更親書之帝又批於後曰大大王賴  
王項琦曰欲乞即今晚宣學士降麻帝復頷之琦召內  
侍高居簡授以御札命翰林學士草制學士承旨張方  
平至榻前稟命帝憑几出數語方平不能辨帝以手指  
畫几方平因請進筆書所諭遂進筆帝書來日降制立  
某為皇太子十字所書名不甚明方平又進筆請之帝  
再書賴王二字又書大大王三字方平退而草制壬寅

立皇子頴王項為皇太子帝既用輔臣議立皇太子因  
泣然下泪文彥博退謂韓琦曰見上顏色否人生至此  
雖父子亦不能無動也琦曰國事當如此可奈何皇子  
始聞命辭於榻前者久之 癸卯大赦賜文武官子為  
父後者勲一轉 乙巳詔以來年正月十九日冊皇太  
子翰林學士承旨張方平為禮儀使翰林學士王珪撰  
冊文錢明逸書冊知制誥宋敏求書寶

資治通鑑後編卷七十四

欽定四庫全書

資治通鑑後編卷七十五

刑部尚書徐乾學撰

宋紀七十五

起彊圉協洽正月  
盡十二月凡一年

英宗體乾應歷隆功盛德憲文肅武睿聖宣孝皇帝

治平四年春正月庚戌朔羣臣上尊號冊於大慶殿太尉奉冊授閣門使轉授內常侍由垂拱殿以進是日大

風霾契丹賀正使在館故事賜宴紫宸殿時上不豫  
命宰臣就館宴之丁巳帝崩於福寧殿神宗即位時  
年二十百官入福寧殿發哀聽遺制見上於東楹皆如  
嘉祐之儀惟入垂拱殿後門乃哭為異帝初晏駕急召  
太子未至帝復手動曾公亮愕然亟告韓琦欲且止勿  
召琦拒之曰先帝復生乃一太上皇愈促之帝始為皇  
子被召入戒舍人曰謹守吾舍上有適嗣吾歸矣及即  
位每命近臣必以官而不名大臣從容以為言帝曰朕

雖宮中命小臣亦未嘗以名也 戊午大赦除常赦所

不原者百官進官一等優賞諸軍悉如嘉祐故事惟百官拜赦不舞蹈舞蹈者嘉祐之失也 己未尊皇太后

為太皇太后皇后為皇太后以宰臣韓琦為山陵使

御史劉庠言禮居喪不飲酒食肉仁宗之喪百官及諸

軍朝晡皆給酒肉京師羊為之竭請給百官素食禮官

以為然執政不從

此據劉庠墓銘及司馬光日記

庚申羣臣拜表請

聽政不允表三上乃從之

樞密院召禮官問詔遼母



后書當何稱欲自稱重姪稱彼為大母判太常寺李柬之同判太常寺宋敏求等以為當稱姪孫叔祖母從之三司使韓絳翰林學士承旨張方平奏疏曰祖宗平天下收斂其金帛納之內帑諸庫其所以遺後世之業厚矣自康定慶歷以來發諸宿藏以助興發百年之積惟存空簿近奉敕書諸軍將校賞給已行支散外至於文武百官既遷官加職其諸賜賚若更循嘉祐近例竊慮國家財力不堪供給伏乞檢會真宗上仙及仁宗即

位舊事施行此乃先朝體例非自今日裁損所營山陵  
制度遺詔戒從省約乞下三司及經由州縣凡係科率  
所及路分當職官吏各據確數明立期會務在愛惜官  
私物力今日月猶賒足以辦集至於諸色用度非所急  
者不以小嗇為無益而弗為不以小費為無傷而不節  
深慮經遠之計以底烝民之生方今之切務莫先於此  
矣太子右庶子韓維言臣竊聞故事大行皇帝當有遺  
留物分賜臣下臣伏思承平日久用度無節以致公私

匱乏又國家不幸四年之內兩遭大故營造山陵及優  
賞士卒所費不貲若用嘉祐之例厚行賜賚臣恐為損  
不少陛下若以為奉承先志理不可罷則望閱諸府庫  
取服用玩好物以充用才足將意便可不須過為豐侈  
所有金帛諸物可以贍兵恤民者願賜愛恤以救當世  
之急弊奏入詔遺賜令內侍省取旨裁減山陵制度令  
三司奉行遺制 初議山陵上以手詔賜執政於資善  
堂曰國家多難四年之中連遭大喪公私困竭宜令王

陶減節冗費且謂執政曰仁宗之喪先帝避嫌不敢裁  
減今則無嫌也 癸亥內出遺留物賜宗室近臣有差  
上謂執政曰仁宗御天下四十餘年宮中富饒故遺留  
特厚先帝御天下才四年固難比仁宗然亦不可無也  
故所賜皆減嘉祐三分之一 丙寅始御迎陽門幄殿  
聽政見百官三司乞內藏錢三十萬緡助山陵支費從  
之 癸酉羣臣拜表請御正殿不許表三上乃許之

戊寅以王陶為羣牧使 二月己酉始御紫宸殿見羣

臣退御延和殿視事

龍圖直學士韓維陳三事一曰

從權聽政蓋不得已惟大事急務時賜裁決餘當簡畧  
二曰執政皆兩朝顧命大臣宜推誠加禮每事諮詢以  
盡其心三曰百執事各有其職惟當責任使以盡其材  
若王者代有司行事最為失體其末又曰天下大事不  
可猝為人君施設自有先後惟加意謹重并注釋滕世  
子問孟子居喪之禮一篇因推及後世變禮以申規諷  
上嘉納焉 立安國夫人向氏為皇后 丙戌御垂拱

殿辛卯白虹貫日 壬辰上手詔曰朕嘗侍先帝左右  
恭聞德音以本朝舊制士大夫之子有尚帝女者輒皆  
升行以避舅姑之尊習行既久義甚無謂朕常念此寤  
寐不平豈可以富貴之故屈人倫長幼之序乎可詔有  
司革之以勵風俗朕聞諭之始欽仰稱歎至於再三不  
幸先帝後嬰疾疹具議中寢朕恭承遺旨敢不遂行可  
令中書門下議降詔有司以發揚先帝盛德於是令陳  
國長公主行見舅姑之禮王師約更不升行公主行見

舅姑之禮自此始 三月以樞密直學士禮部郎中王  
陶為右諫議大夫權御史中丞陶入對便殿上引書咸  
有一德諭陶曰朕與卿一心不可轉也問以時事陶請  
謹聽納明賞罰斥佞人任正士復轉對以通下情省民  
力以勸農桑先儉素以風天下限年藝以汰冗兵 命  
天章閣侍制陳薦同修撰仁宗實錄 降工部侍郎御  
史中丞彭思永為給事中知黃州主客員外郎殿中侍  
御史裏行蔣之奇為太常博士監道州酒稅先是監察

御史劉庠劾參知政事歐陽修入臨福寧殿衰服下衣  
紫衣上寢其奏遣使諭修令易之朝論以濮王追崇事  
疾修者衆欲擊去之其事無由有薛良孺者修妻之從  
弟也坐舉官被劾冀會赦免而修乃言不可以臣故徼  
幸乞特不原良孺竟坐免官怨修切齒修長子發娶鹽  
鐵副使吳充女良孺因謗修帷簿事連吳氏集賢校理  
劉瑾與修亦仇家亟騰其謗思永聞之間以語其僚屬  
之奇之奇始緣濮議合修意修特薦為御史方患衆論



指以為姦邪求所以自解及得此遂獨上殿劾修乞肆  
諸市朝上疑其不然之奇引思永為証伏地叩首堅請  
必行之奇初不與同列謀之後數日乃以奏稿示思永  
挽思永自助思永以為帷簿之私非外人所知但其首  
建濮議違典禮以犯衆怒不宜更在政府上乃以之奇  
思永所奏付樞密院修上章自列乞選公正之臣為臣  
辨理上初欲誅修以手詔密問天章閣待制孫思恭思  
恭極力救解上悟復取之奇思永所奏以入并修章付

中書令思求之奇具傳達人姓名以聞之奇言得自思求而思求辭以出於風聞年老昏繆不能記姓名因極陳大臣朋黨專恣非朝廷福修復言臣忝列政府動係國體不幸枉遭誣陷惟賴朝廷推究虛實使罪有所歸章凡三上而充亦上章乞朝廷力與辨正虛實明示天下使門戶不致枉受污辱於是上復批付中書令思求等不得妄引浮說具傳達人姓名并所聞因依明據思求與瑾同鄉力為瑾諱乃言臣待罪憲府凡有所聞合

與僚屬商議故對之奇說風聞之由然曖昧無實賞戒之奇勿言無所逃罪而之奇亦奏此事臣止得於思永遂以上聞如以臣不當用風聞言大臣事臣甘與思永同貶故二人同降黜上手詔賜修曰數日來以言者汚卿以大惡朕曉夕在懷未嘗舒釋故數批出詰其所從來訖無以報前日見卿文字力要辨明遂自引過今日已令降黜仍榜朝堂使中外知其虛妄事理既明人疑亦釋卿宜起視事如初無恤前言他日上謂吳奎曰蔣

之奇敢言而所言曖昧既罪其妄欲賞其敢奎曰賞罰

難並行乃止

考異李燾曰墨史孫思恭傳云思恭性不忤物犯之不校歐陽修初不知思恭以為

詐及修為言者所攻上將誅修手詔密問思恭思恭極力救解朱史以為言者攻修先帝加詰問既辨明賜手詔召之豈有誅修之意遂刪之按司馬光日記以之奇等奏付樞密院後數日乃復取入密詔問思恭必非墨史之妄今仍撮取附見

權知貢舉司馬光等上言所考試合格

進士許安世以下三百五人分四等明經諸科二百一十一人分三等詔進士第一第二第三等賜及第第四等賜同出身明經諸科第一第二等並賜及第第三等

賜同出身敕下貢院放榜安世及第二第三人並為防禦團練推官其餘注官守選如例 丙辰命提點開封府界公事祠部郎中陳汝羲判三司都磨勘司以知開封縣都官員外郎羅愷代其任愷入見上問府界事皆不能知上不悅及見汝羲問之應答詳敏翼日謂執政曰愷不才宜復用汝羲仍與館職執政言汝羲資序已高復為提點則下遷宜但令試館職而已上從之知制誥邵必言陛下新即位以言語擢汝羲如漢文賞上林

嗇夫恐臣下爭以利口求進乞罷之不從 昌王顥樂  
安郡王顥乞解官行服詔兩制與太常禮院詳定典禮  
翰林學士承旨張方平等言謹按大行遺制喪服以日  
易月自皇帝下至文武百官並依先朝典故惟宗室出  
則慘服居則衰麻以終制蓋一法度所以尊天子也皇  
帝承大統奉宗廟昌王樂安郡王當與宗室同例不容  
以私恩為異從之 丙寅錢明逸罷翰林學士為端明  
殿學士兼龍圖閣學士先是御史蔣之奇言臣累奏彈

明逸姦邪及吳申劉庠亦嘗論列先帝屬疾未及施行  
臣與明逸素無嫌隙但以傾險儉薄在仁宗朝附賈昌  
朝夏竦王拱辰張方平之黨陷杜衍范仲淹尹洙石介  
之徒朝廷一空天下同疾况文辭紕繆政術乖疎貪賊  
有聞沈酒汚濫豈可冒居禁苑而同知諫院傳卞亦有  
言執政召明逸示以臺諫章疏使自引疾因改命之

丁卯三司言在京粳米約支五年以上慮歲久陳腐欲  
令發運司於上供年額權住起發五十萬石於穀價貴

處減和糴之數變市金銀絹輸權貨務封樁分給三路  
以備軍須從之 壬申尚書左丞參知政事歐陽修罷  
為觀文殿學士刑部尚書知亳州彭思永等既以論修  
貶而知雜事御史蘇察御史吳申言猶不已修亦三表  
乞罷故命出守初英宗以疾未視朝太皇太后垂簾修  
與二三大臣主國論每簾前奏事或執政聚議事有未  
同修未嘗不力爭臺諫官至政事堂論事事雖非已出  
同列未及啟口而修已直前折其短士大夫建明利害



及所請前此執政多姦阿不明白是非至修必一二數  
之曰某事可行某事不可行用是怨誅者益多英宗嘗  
稱修曰性直不避衆怨修亦常誦故相王曾之言曰恩  
欲歸己怨使誰當既出守遂連六表乞致仕不從修年  
方六十也 癸酉以樞密副使禮部侍郎吳奎參知政  
事上欲用奎宰相言陳升之有輔立陛下功上曰奎輔  
立先帝其功尤大遂越次用之奎入謝曰進治說三篇  
上嘗語以追尊濮王事與漢宣帝異奎對曰然宣帝於

昭帝祖行昭穆不相當又大臣所立豈同仁宗能以義立先帝為子先帝入奉大統天下欣戴雖先帝素有令聞良由仁宗命之為子所以人無異言因言仁宗本意止在先帝更無他擇為大臣間有異議者遂輟終能決意建立此天地之恩不可忘也追尊事誠牽私恩上深然之又言此為歐陽修所誤奎對曰韓琦於此事亦失衆心臣數為琦所薦天下公論不敢君前有所隱他日奎進言陛下宜推誠以應天天意無他合人心而已若

至誠格物物莫不以至誠應於上自然感召和氣今民  
力困極國用窘乏直須順成然後可及他事也帝王之  
職所難在判別忠邪自餘庶務各有司存但不使小人  
得害君子君子常居要近則自治矣上因言堯時四凶  
猶在朝奎對曰四凶雖在不能惑堯之聰明聖人以天  
下為度何所不容未有顯過固宜包荒但不可使居要  
近耳 太常禮院言準嘉祐詔書定太廟七世八室之  
制今大行皇帝祔廟有日僖祖在七室之外禮當祧遷

將來山陵畢請以大行皇帝神主祔第八室僖祖文懿  
皇后神主依唐故事祔藏於西夾室以待禘祫自仁宗  
而上至順祖以次升遷伏請下兩制待制以上參議翰  
林學士承旨張方平等言同堂八室廟制已定僖祖當  
祔合於典禮請依禮院所奏詔恭依 乙亥贈太師尚  
書令兼中書令定王允良卒贈太師有司以允良起居  
無度反易晦明諡曰榮易 初蔣之奇劾歐陽修上怒  
曰先帝大漸邵亢建垂簾之議如此大事不言而抉人

閨門之私乎之奇以告吳申申即劾亢事下中書上徐知其妄中書亦寢申所奏亢時同知貢舉及出上殿自辯曰臣在先帝時若有是請必不為先帝所容且先帝不豫以來羣臣莫得進見臣無由面陳必有章奏願陛下索之禁中若得之臣當伏誅不然則讒臣者豈得不問願下獄考實上曰朕不疑卿吳申所奏已不行矣

閏月癸未太白晝見 甲申夏國主諒祚遣使來獻方物謝罪請戒飭酋長守封疆如去冬所賜詔旨復以詔答

之曰苟封奏所叙忠信弗渝則恩禮所加歲時如舊仍  
賜絹及銀各五百疋兩 己丑以京西轉運使刑部郎中  
劉述兼侍御史知雜事於是蘇軾遷度支副使中書奏  
以述代之中丞王陶言述任非所長上因賜陶手詔曰  
朕固疑述朝望不著士大夫罕有稱者方欲以訪卿而  
卿適有論列甚符朕意豈得不謂君臣一心覽章賞嘆  
至於三四反凡執政選言事者利在循嘿錄錄輩此意  
了然可見誠如卿論呂誨傅堯俞朕固知其方正可使

止為先朝所逐未欲遽用俟其歲月稍久任之亦未晚也知雜御史誰可當者朝夕密以名聞然上亦竟用述御史吳申言竊見先召十人試館職而陳汝羲亦預

漸至冗濫兼所試止於詩賦非經國治民之急欲乞兼用兩制薦舉仍罷詩賦試策三道問經史時務每道問十事以通否定高下去留其先召試人亦乞用新法考試明詔兩制詳定以聞其後翰林學士承旨王珪等言宜罷詩賦如申言於是詔自今館職試論一首策一道

庚子詔曰朕以菲德承至尊托於公卿兆民之上惟  
治忽在躬夙夜兢兢上思有以奉天命下念所以修政  
事之統愧不敏明未燭厥理夫闢言路通上下之志欲  
治之主所同趣也其布告内外文武羣臣若朕知見思  
慮之所未及至於朝之闕政國之要務邊防戎事之得  
失郡縣民情之利害各令直言抗疏以聞無有所隱言  
若適用亦以得人觀其器能當從甄擢惟爾文武其各  
體朕茲令之非徒也 御史中丞王陶言臣奉詔別舉



臺官緣有才行可舉之人多以資淺不應敕文欲乞許  
舉三任以上知縣資序人為御史裏行從之先是陶乞  
復用呂大防郭源明執政以為意欲逼已不悅工部  
郎中知制誥王安石既除喪詔令赴闕安石屢引疾乞  
分司上語輔臣曰安石歷先帝朝累召不起或以為不  
恭今召又不至果病耶有所要耶曾公亮對曰安石文  
學器業時之全德宜膺大用累召不起必以疾病不敢  
欺罔吳奎曰臣嘗與安石同領羣牧備見其護前自用

所為迂闊萬一用之必紊亂綱紀上未審奎重言之癸卯詔安石知江寧府衆謂安石必辭龍圖閣直學士韓維言臣今日聞除王安石知江寧府竊以為非所以致安石也何則安石知道守正不為利動其於出處大節料已素定於心必不妄發安石久病不朝今若才除大郡即起視事則是安石偃蹇君命以要自便臣固知安石之不肯為也所可致者惟有一事即陛下向所宣諭亦臣向所開陳者是也若人君始初踐阼慨然想見賢

者與圖天下之治孰不願効其忠伸其道哉使安石甚病而愚則已若不至此必翻然而來矣議者以為安石可以漸致而不可以猝召是不知安石者之言惟賢者可以義動而不可以計取陛下斷而行之毋以前議為疑則天下幸甚

李燾曰韓維論王安石擢維奏議具載之足明安石進退失據也

已而

詔到安石即詣府視事不復辭也學士院言屯田員外郎夏倚雄武節度推官章惇詩賦中等詔以倚為江南路西路轉運判官惇為著作佐郎甲辰詔諸路帥

臣及副總管或有移易可依慶厯故事中書樞密院參議以龍圖閣直學士知蔡州呂公著龍圖閣直學士兼侍講司馬光並為翰林學士光累奏固辭不許上面諭光曰古之君子或學而不文或文而不學惟董仲舒揚雄兼之卿有文學尚何辭光曰臣不能為四六上曰如兩漢制詔可也光曰本朝故事不可上曰卿能舉進士高等而不能為四六何耶光趨出上遣內侍至閣門強光受告光拜而不受趣光入謝光入至庭中猶固辭

詔以告置先懷中光不得已乃受他日上問王陶曰公著及光為學士當否陶曰二人者臣嘗論薦矣用人如此天下何憂不治 丙午以屯田員外郎劉攽著作佐郎王存為館閣校勘太常丞張公裕殿中丞李常為秘閣校勘著作佐郎胡宗愈為集賢校理並以召試學士院詩賦入等也攽試入優等故事當除直館又員外郎例不為校勘而攽素與王陶有隙陶及待御史蘇軾共排之故攽得館閣校勘攽敬之第也 夏四月以殿中

承唐淑問為監察御史裏行帝諭曰朕以家世用卿卿當謹家法人臣病外交陰附卿宜自結主知此言者尚抉剔細故以為能濁亂人聰明無益也論事必務大體乃為稱職淑問介子也 庚戌請大行皇帝謚於南郊召還陝西宣撫使判渭州郭逵同簽書樞密院事御史中丞王陶言韓琦引逵二府至用太祖出師故事劫制人主琦必有姦言惑亂聖聰願罷逵為渭州帝不可曰逵先帝所用今遽罷之是章先帝任人之失也 先

是御史臺以狀申中書云檢會皇祐編勅常朝日輪宰臣一員押班近據引贊官稱宰相更不赴竊慮此編勅儀制別有衝替伏乞明降指揮中書不報中丞王陶因以狀白宰相又不報乙卯陶遂劾奏韓琦曾公亮不押常朝班至謂琦跋扈引霍光梁冀專恣事為諭甲子琦公亮上表待罪帝以陶章示琦琦奏曰臣非跋扈者陛下遣一小黃門至則可縛臣以去矣帝為之動而陶連奏不已帝以問知制誥滕甫甫曰宰相固有罪然指為

跋扈則臣以為欺天陷人矣丙寅帝徙陶為翰林學士  
司馬光權御史中丞兩易其任丁卯光入對言自頃宰  
相權重今陶以論宰相罷則中丞不可復為臣願俟宰  
相押班然後就職許之時光中丞誥已進入而王陶學  
士之命中書獨持之不下戊辰吳奎趙槩面對堅請黜  
陶於外帝不許復請授羣牧使許之既而直批送中書  
以陶為翰林學士時宰相琦方在告不出奎即具奏言  
閏月以來寒暄不節暴風屢作今茲時雨愆亢螟螣孽



生過不在他一王陶而已昔唐德宗疑大臣信羣小斥陸贄而以裴延齡等為腹心天下稱為闇主今陶挾持舊恩排抑端良如韓琦曾公亮不押班事蓋以向來相承非由二臣始廢今若又行內批除陶翰林學士則是因其過惡更獲美遷天下待陛下為何如主哉陶不黜陛下無以責內外大臣展布四體己已奎遂稱疾求罷帝封奎劄子以示陶陶復劾奎附宰相欺天下六罪侍御史吳申吳景奏乞留陶依舊供職并劾奎有無君之

心數其五罪帝以手札賜知制誥邵亢趣進入陶學士  
誥亢遂言御史中丞職在彈劾陰陽不和咎由執政奎  
所言顛倒失大臣體帝由是有逐奎意龍圖閣直學士  
韓維言宰相跋扈王法所當誅也陶言是宰相安得無  
罪陶言非則安得罷臺職而已今為翰林學士是遷也  
願廷對羣臣使是非兩判庚午帝批付中書王陶吳申  
吳景過毀大臣陶出知陳州申景各罰銅二十斤吳奎  
位執政而彈劾中丞以手詔為內批三日不下其罷知

青州帝語張方平曰奎罷當以卿代方平辭且言韓琦  
久在告奎免必不復起琦勲在王室願陛下復奎位手  
詔諭琦以全始終之分司馬光言奎名望素重今為陶  
罷奎恐大臣皆不自安紛紛引去陛下初即位於四方  
觀聽非宜卒未公亮入對亦請留奎帝許之壬申召奎  
對延和殿慰勞之使復位曰成王豈不疑周公耶奎既  
復位邵亢更以為言帝手札諭亢曰此無他欲起堅卧  
者耳蓋指琦也初王陶事琦甚謹琦深器之東宮始建

英宗命以蔡抗為詹事琦固薦陶文彥博私謂琦盍止  
用抗琦不從及帝即位頗不悅大臣之專陶料必多所  
易置欲自規重位故視琦如仇力攻之彥博謂琦曰頗  
記除詹事時否琦大愧曰見事之晚真宜受撻陶既至  
陳州謝表詆宰相不已中書擬再貶光言陶誠有罪然  
陛下欲廣言路屈己愛陶而宰相獨不能容乎乃止

罷諸州歲貢飲食果藥凡四十三州七十種 癸酉詔  
陝西河東經畧轉運司察主兵臣僚怯懦老病者以聞

中丞司馬光上疏論修身之要三曰仁曰明曰武治  
國之要三曰官人曰信賞曰必罰其說甚備且曰臣昔  
為諫官即以此六言獻仁宗其後以獻英宗今以獻陛  
下平生力學所得盡在是矣是月錄京師繫囚遣使循  
行陝西河北京東西路體量安撫 五月辛巳以久旱  
命宰臣禱雨 韓琦曾公亮言臣等近以王陶彈奏不  
過文德殿押班先嘗面奏舊以前殿退晚及中書聚廳  
見客日有機事商議故不及押班為歲已久即非始自

臣等今檢詳唐及五代會要每月凡九開延英則明其餘不坐之日宰臣須赴正衙押班及延英對宰臣日未御內殿前令閣門使傳宣放班則宰臣更不赴正衙押班明矣本朝自祖宗以來繼日臨朝宰臣奏事祥符勅宰臣依故事赴文德殿押班行之不久漸復墮廢緣中書朝退後議政動踰時刻若日赴文德押班則機務常有妨滯乞下太常禮院詳定司馬光言舊制當押班不須詳定癸未詔自今晝刻辰正垂拱奏事未畢聽宰相

不赴文德殿令御史臺放班退未及辰正並依祥符勅  
令求為定制 甲辰以屯田員外郎張唐英為殿中侍  
御史裏行從翰林學士王珪范鎮之薦也唐英初調穀  
城令縣圃歲畦薑貸種與民還其陳復配買取息唐英  
至空其圃植千株柳作柳亭於其中聞者咨美英宗初  
立唐英上謹始書言為人後者為之子恐他日有引定  
陶故事以惑聖聽者願杜其漸既而濮議果起珪鎮謂  
唐英有先見之明故薦之 乙巳寶文閣成置學士直

學士待制官奉英宗御書藏於閣 戊申遼有司奏新  
城縣民楊從謀反偽署官吏遼主曰小人無知此兒戲  
耳獨流其首惡餘釋之 河北旱民流入京師待制陳  
薦請以便糴司陳粟貸民戶二石從之司馬光上疏曰  
聖王之政使民安土樂業而無離散之心其要在於得  
人而已以臣愚見莫若擇公正之人為河北監司使察  
災傷州縣守宰不勝任者易之然後多方那融斗斛使  
賑濟土著之民居者既安則行者思反若縣縣皆然豈



復有流民哉於是詔河北運司約束州縣倍加存恤

己未以龍圖閣直學士知成都府趙抃知諫院入謝帝  
謂抃曰聞卿入蜀以一琴一鶴自隨為政簡易亦稱是  
耶故事近臣自蜀還者必登省府不為諫官大臣以為  
疑帝曰吾賴其言耳倘欲大用何必省府乎抃上疏言  
任道德委輔弼別邪正去侈心信號令平賞罰謹機密  
備不虞勿數赦容諫諍十事又言呂誨傅堯俞范純仁  
呂大防趙鼎馬默皆骨鯁敢言久譴不復無以慰搢紳

之望復論五費謂宮掖宗室官濫兵冗土木之事多見  
納用 卒未詔天下官吏有能知差役利害可以寬減  
者實封條析以聞先是三司使韓絳言害農之弊無甚  
差役之法重者衙前多致破產次則州役亦須重費向  
聞京東民有父子二丁將為衙前父告其子云吾當求  
死使汝曹免於凍餒遂自經而死又聞江南有嫁其祖  
母及與母析居以避役者又有鬻田減其戶等者田歸  
官戶不役之家而役併於同等見存之戶望令中外臣

庶條其利害委侍從臺省官集議裁定使力役無偏重之患則農民有樂業之心帝納其言故有是詔役法之議始此 陝西轉運使薛向言知青澗城种諤招西人朱令陵最為橫山得力酋長已給田十頃宅一區乞除一班行使夸示諸羌誘降橫山之衆詔增給田五頃諤世衡之子也向在英宗時嘗獻西陲利害十五篇去冬又上疏陳禦邊五利一曰任將帥以制其衝二曰亟攻伐以罷其敵三曰省戍兵以實其力四曰絕利源以敝

其國五曰惜經費以固其本疏奏英宗稱善嘗置諸左  
右帝見而奇之會邊臣多言橫山族帳可招納者是日  
召向入對凡向所陳計策帝皆令勿語兩府自以手詔  
指揮 知汀州周約進桐板二片其木成文有天下太  
平四字賜獎諭付史館 乙亥御史張紀言近歲以來  
百司庶務多稟決於中書臣謂政府不當侵有司之職  
有司亦不當以細務汨政府詔中書樞密院應細務合  
歸有司者條析以聞後中書具三十一事樞密院具六

十二事皆歸之有司 秋七月庚辰翰林承旨張方平等言本朝典禮循唐之舊真宗仁宗皆祀於明堂以配上帝今季秋大享明堂伏請以大行皇帝配詔恭依詔察富民與妃嬪家婚姻夤緣得官者 己丑命戶部郎中趙抃刑部郎中陳薦詳定中外封事帝以命張方平司馬光至是復令抃等同之 辛卯告大行皇帝諡於天地宗廟社稷 壬辰上寶冊於福寧殿 帝初即位內臣以覃恩升朝者皆罷內職獨勾當御藥院高居

簡等四人留如故司馬光疏言居簡資性姦回工讒善  
佞久處近職罪惡甚多項在先朝依憑城社物論切齒  
及陛下繼統乃復先自結納使寵信之恩過於先帝願  
明治其罪以解天下之惑帝曰祔廟畢自當去光曰閹  
闖小臣何繫山陵先後舜去四凶不為不忠仁宗貶丁  
謂不為不孝帝從之癸巳居簡罷為供備庫使乙未  
以三司檢法官呂惠卿編校集賢書籍惠卿與王安石  
雅相好安石薦其才於曾公亮公亮遂舉惠卿館職惠

卿晉江人也 辛丑熒惑晝見凡三十五日

考異宋史神宗紀天

文志皆無今據遼史通宗紀書之

丙午文州曲水縣令宇文之邵上

書指陳得失之邵漢州緜竹人為曲水令轉運使以輕縑高其價使縣配賣之邵言縣下江上山地狹人貧耕者亡幾方歲儉饑羌夷數入寇不可復困之以求利轉運使怒會帝即位求言乃上書曰千里之郡有利未必興有害未必除者轉運使提點刑獄制之也百里之邑有利未必興有害未必除者郡制之也前日敕令應在

公逋負一切蠲除而有司操之益急督之愈甚使上澤  
不下流而細民日困如擇賢才以為三司之官稍假郡  
縣以權則民瘼除矣然後監審聚蹶槁之盛以保安外  
戚考常棣角弓之義以親睦九族興隆典拔滯淹遠夸  
毗來忠讜凡所建置必與大臣共議以廣其善號令威  
福則專制之如此則太平可拱而俟也書奏不報喟然  
曰吾不可仕矣遂以太子中允致仕時年未四十自強  
於學不易其志屏居十五年而終司馬光曰吾聞志不



行顧祿位如錙銖道不行視富貴如土芥今於之邵見之范鎮亦曰之邵位下而言高學富而行篤少我二十一歲而先我挂冠使吾慊然夏國遣使奉慰及進助

山陵八月丁未朔太白晝見辛亥司馬光言臣竊

聞陛下好令內臣采訪外事及問以羣臣能否臣愚竊以為非宜陛下內有兩府兩省臺諫外有提轉牧守皆腹心耳目股肱之臣也陛下誠能精擇其人使之各舉其職則天下之事猶一堂之上陛下何患於不知哉今

深處九重詢於近習采道聽塗說之言納曲躬附耳之  
奏不驗虛實即行賞罰臣恐讒邪得以逞其愛憎而陛  
下為之受其譏謗也 戊午復西夏和市 張方平司  
馬光奏所詳定內外封事帝令中書參議光對延和殿  
言封事善者在陛下決行之帝曰大臣多不欲行光曰  
陛下詢芻蕘以廣聰明斯乃社稷之福而非大臣之利  
也帝曰如有言無行何光曰然不知言無以知人要面  
詢乃試以事則真偽自辨矣癸亥詔詳定封事所奏如

其中有難行者可召詳定官赴中書問難令述利害以  
進 己巳京師地震帝問輔臣曰地震何祥也曾公亮  
對曰天裂陽不足地震陰有餘帝曰誰為陰公亮曰臣  
者君之陰子者父之陰婦者夫之陰外國者中國之陰  
皆宜戒之吳奎曰但為小人黨盛耳帝不懌 癸酉葬  
憲文肅武宣孝皇帝於永厚陵廟號英宗 是月判河  
陽軍富弼上疏曰帝王都無職事惟別君子小人然千  
官百職豈盡煩帝王辨之乎但精求任天下之事者不

使一小人參用於其間自莫不得人矣陛下勿謂所采  
既廣所得必多其間當防小人惑亂聖聽姦謀似正詐  
辭似忠疑似之際不可不早辨也 九月丁丑詔減諸  
路逃田稅額 壬午祧僖祖及文懿皇后乙酉祔英宗  
神主於太廟樂曰大英之舞 戊子減兩京畿內鄭孟  
州囚罪一等民役山陵者蠲其賦 辛卯徙封昌王顥  
為岐王樂安郡王顥為高密郡王 遣孫思恭等報謝  
於遼且賀生辰正旦 壬辰錄周世宗從曾孫貽廓為

三班奉職 甲午遼遣耶律好謀等來賀即位 戊戌  
召知江寧府王安石為翰林學士 辛丑韓琦吳奎陳  
升之並罷琦歷相三朝或言其專自王陶論劾後曾公  
亮因力薦王安石欲以間琦琦因稱疾求去帝不許以  
詔書慰撫琦又疏有四當去復不許厚陵復土琦更不  
入中書請甚堅於是帝夜召張方平議且曰琦志不可  
奪矣方平遂建議宜罷以兩鎮節鉞且虛府以示復用  
乃除鎮安武勝軍節度使守司徒檢校太師兼侍中判

相州帝復召知制誥鄭獬草奎知青州及方平趙抃參知政事制賜雙燭歸舍入院外廷無有知者明旦獬進草遂降付中書升之初名旭避帝嫌名故以字行帝始擢任楊定升之屢諫不宜生邊事由是忤旨以母老乞便郡遂出知越州以樞密副使呂公弼為樞密使翰林學士承旨張方平知諫院趙抃並參知政事三司使韓絳知開封府邵亢並樞密副使先是薛向种諤奏蕃部威明山有歸附意壬寅司馬光對延和殿言諒祚

稱臣奉貢不當誘其叛臣以興邊事帝曰此外人妄傳耳光曰陛下知薛向之為人否帝曰固非端方士也徒以其知錢穀及邊事耳光曰錢穀誠知之邊事則未也又言張方平文章之外姦邪貪猥帝曰有何實狀光曰請言臣所目見者帝作色曰每有除拜衆言輒紛紛非朝廷美事光曰此乃朝廷美事也知人帝堯難之况陛下新即位萬一用一姦邪若臺諫循默不言陛下從何知之帝曰吳奎附宰相否光曰不知也帝曰結宰相與

結人主孰賢光曰結宰相為姦邪然希意迎合觀人主  
趣向而順之者亦姦邪也 潮州地震 癸卯同發書  
樞密郭逵罷為宣徽南院使判鄆州從張紀唐淑問趙  
抃言也達至鄆七日徙帥延州 權御史中丞司馬光  
復為翰林學士兼侍讀學士以滕甫權御史中丞光言  
臣昨論張方平參政不協衆望臣識淺材下其言不足  
採向者仁宗時包拯最名公直與臺諫官共言方平姦  
邪貪猥乞盡令檢取言方平章奏及開封府陳升之兩



處推勘劉保衡公案即知臣所言非一人私論也所有  
新命臣未敢祇受光等誥勅下通進銀臺司呂公著具  
奏封駁帝手詔諭光曰朕以卿經術行義為世所推今  
將開邇英之席欲得卿朝夕討論敷陳治道以箴遺闕  
故換卿禁林復兼勸講非為前日論奏張方平也呂公  
著封還蓋不知此意耳於是取誥敕直付閤門趣光等  
受職公著又言誥敕不由本司則封駁之職因臣而廢  
帝手批其奏曰俟開邇英當諭朕意 韓琦既得判相

州入對帝泣下琦亦垂涕稱謝詔琦出入如二府儀又  
賜興道坊宅一區擢其子祕書丞忠彥為祕閣校理帝  
曰卿去誰可屬國者王安石何如琦曰安石為翰林學  
士則有餘處輔弼之地則不可帝默然 冬十月丙午  
漳泉諸州地震 丁未富弼罷判河陽 戊申建州邵武興  
化軍地震 己酉初御邇英閣召侍臣講讀經史講退  
獨留呂公著語曰朕以司馬光道德學問欲常在左右  
非以其言事不當也公著力請解職許之他日又謂公

著曰光方直如迂濶何公著曰孔子上聖子路猶謂之迂孟軻大賢時人亦謂之迂况光者豈免此名大抵慮事深遠則近於迂矣願陛下更察之先是御史臺門無故自壞後十餘日而光罷命御史中丞滕甫考諸路監司課績舊制審定殿最格法自發運使下至知州皆歸考課院專以監司所第等級為據至考監司則總其甄別部吏能否副以採訪才行合二事為課悉書中等無高下帝即位凡職皆有課凡課皆責實監司所上守

臣課不占等者展年降資而治狀優異者增秩賜金帛  
以璽書獎勵之若監司以上則命御史中丞侍御史考  
校參知政事張方平以父憂罷庚戌給陝西轉運  
司度僧牒令糴穀賑霜旱州縣癸丑詔翰林學士御  
史中丞侍御史知雜事舉材堪御史者各二人甲寅  
翰林學士司馬光初進讀通志於邇英閣帝賜名資治  
通鑑親製序以賜光令候書成寫入又賜頴卽舊書二  
千四百二卷序畧曰博而得其要簡而周於事是亦典

刑之總會冊牘之淵林矣 癸酉知青澗城种諤復綏  
州夏將威明山部落在綏其弟夷山降於諤諤使人因  
夷山以誘之賂以金孟明山小吏李文喜受而許降而  
明山未之知也諤即奏言諒祚累年用兵人心離貳嘗  
欲發橫山族帳盡過興州族帳皆懷土重遷其首領威  
明山欲以橫山之衆取諒祚以降帝信之知延州陸詵  
言以情偽未可知戒諤毋妄動諤持之力詔詵召諤問  
狀且與轉運使薛向議撫納乃共畫三策令幕佐張穆

之入奏穆之陰受向指詭言必可成帝意說不協力徒  
之秦鳳諤不待報悉起所部兵長驅而前圍其帳明山  
驚援槍欲鬪夷山呼曰兄已約降何為如是文喜因出  
所受金盃示之明山投槍大哭遂舉衆從諤而南得酋  
領三百戶萬五千勝兵萬人將築城於其地說以無詔  
出師召諤還軍次懷遠敵衆四萬人全集城下諤出兵  
擊走之遂城綏州初諤言明山約降帝將令邊臣招納  
其衆司馬光上疏極論以為明山之衆未必能制諤祚

幸而勝之滅一諒祚生一諒祚何利之有若其不勝必引衆歸我不知何以待之臣恐朝廷不獨失信於諒祚又將失信於明山矣若明山餘衆尚多還北不可入南不受窮無所歸必將突據邊城以救其命陛下獨不見侯景之事乎帝不聽及諤取綏州費六十萬西方用兵

蓋自此始矣

考異東都事畧种諤傳云銀臺監軍司牙吏史屈子託言威明山來報內附諤即上

聞不俟報募可使者通蠟書於明山與屈子定計領所部期日會於綏州諤起所部蕃漢兵會於懷遠砦移折繼世赴銀夏應接長驅入綏州夜度大理水駐師離思曲厥明屈子及諸酋長脅明山開門迎納折繼世亦願

兵會於師遂築綏州城按此文與宋史  
種諤傳小異而宋史較為詳確今從之

種諤既取綏

州夏人乃詐為會議誘知保安軍楊定等殺之朝廷謀  
西討邵亢曰天下財力殫屈未宜用兵唯當降意撫納  
俟不順命則師出有名矣因條上其事詔報曰中國民  
力大事也兵興之後不無倍率人心一搖安危所繫且  
動自我始先違信誓契丹聞之將不期而自合茲朕所  
深憂者當悉如卿計於是欲棄綏州知延州郭遼言賊  
既殺王官而又棄綏不守見弱已甚且威明山舉族來



歸當何以處之帝不聽十一月丁丑詔近臣各舉才行可任使者一人文彥博言於帝曰諸路帥臣轉運使職任至重一道慘舒繫焉所宜擇人久任又言兩府堂陞之重亦當久任使其下不能傾危乃可立事韓絳曰漢王嘉以為二千石尊重難危乃可使下況堂陞之勢乎戊寅詔求直言詔御史臺每遇起居日令百僚轉對丙戌詔曰故事二府初入舉所知者三人將以觀大臣之能比年多因請謁干譽薦者不公其令中

書樞密院舉人皆明言才業所長堪任何事以副朕為  
官擇人之意 改命韓琦判永興軍兼陝西路經畧安  
撫使賜手札趣令治裝琦言邊臣肆意妄作構怨外蕃  
臣朝夕引道非難但須稟朝廷成筭願召二府亟決之  
琦入辭曾公亮等方奏事乞與琦同議帝召之琦曰臣  
前日備員政府所當共議今藩臣也惟奉行朝廷命令  
耳決不敢與聞又言王陶指臣為跋扈今陛下乃舉陝  
西兵柄授臣復有劾臣如陶者則臣赤族矣帝曰侍中

猶未知朕意邪 丁亥詔令天下州軍各上所轄縣令  
治狀優劣具條約令考課院詳定以聞 戊子分命宰  
臣祈雪 置馬監於河東交城縣 庚寅詔近臣以舉  
官不當經三劾者中書別奏取旨 壬辰夏國遣使進  
回鶻僧金佛梵覺經於遼 乙未詔内外文武官各舉  
所知二人見任兩府三人或恥於自媒久淹下位或偶  
因微累遂廢周行者咸以名聞 帝以向傳範知澶州  
兼京東西路安撫使傳範敏中之子也知諫院楊繪言


后族不當領安撫使請易之以杜外戚干進之漸文彥博曰傳範累典郡有政聲非由外戚帝曰得諫官如此言甚善可以止他日妄求者已亥命改知鄆州他日繪又言曾公亮不當用其子孝寬判鼓院帝謂滕甫曰鼓院傳達而已何與於事甫曰人有訴宰相者使其子傳達可乎且天下見宰相子在是豈敢復訴事帝為寢其命繪亦解諫職改兼侍讀繪固辭甫言於帝帝詔甫曰繪抗跡孤遠立朝寡援不畏彊禦知無不為朕一見許其

忠蓋擢寘言職信之亦篤矣今日之除蓋難與宰相並  
立於輕重之間姑令少避耳卿其諭朕意繪曰諫官不  
得其言則去經筵非姑息之地卒不拜未閱月復知諫  
院 十二月辛酉詔以來歲日食正旦自乙丑避正殿  
減常膳罷朝賀 壬戌詔起居日增轉對官二人 丙  
寅詔曰獄者民命之所繫也此聞有司歲考天下之奏  
而瘦死者多其具為令提點刑獄歲終會死者之數以  
聞委中書檢察或死者過多官吏雖已行罰當更黜責

己巳遼遣蕭傑等來賀正旦 夏人求以亡命景詢  
易威明山郭遠曰詢庸人也於事何所輕重受之則不  
得不還明山恐自是蕃酋無復敢向化矣是月逵訶得  
殺楊定等首領姓名謀告將斬之於境以謝罪逵曰是  
且梟死囚以給我報曰必執李崇貴韓道喜來夏人言  
殺之矣逵命以二人狀貌物色詰問夏情得乃錮而獻  
之 夏國主諒祚殂年二十一偽諡昭英皇帝廟號毅  
宗葬安陵子秉常即位時年七歲梁太后攝政 是月

韓琦至永興初薛向郭逵等議欲存綏州詔琦度其可  
否琦奏賊今已誘殺楊定等綏州不可棄也及諒祚病  
死其子秉常方幼琦因奏當此變故尤非棄綏之時文  
彥博呂公弼恥於中變督促棄綏如初琦亦條陳不已  
帝遣入內押班王昭明齎手詔訪琦利害琦復具奏言  
綏不可棄乃詔如琦議是歲觀文殿學士太子少師  
致仕胡宿卒宿為人清謹忠實內剛外和臨事重慎不  
輒發發即不可回尤顧惜大體其篤行自勵至於貴達

常如布衣時  
遼南京旱蝗





資治通鑑後編卷七十五